

Na osnovu člana IV. 4. e) Ustava Bosne i Hercegovine, člana 2. stav (2) i člana 7. stav (1) tačka b) Zakona o nezavisnim i nadzornim tijelima policijske strukture Bosne i Hercegovine („Službeni glasnik BiH“, broj 36/08) Parlamentarna skupština Bosne i Hercegovine, na 63. sjednici Predstavničkog doma, održanoj 4. novembra 2009. godine, i na 38. sjednici Doma naroda, održanoj 13. novembra 2009. godine, usvojila je

POSLOVNIK

o radu Nezavisnog odbora kao nezavisnog tijela policijske strukture Bosne i Hercegovine

POGLAVLJE I. OPĆE ODREDBE

Član 1. (Predmet)

Poslovnikom o radu Nezavisnog odbora (u daljnjem tekstu: Poslovnik) uređuju se način i principi rada Nezavisnog odbora kao nezavisnog tijela policijske strukture Bosne i Hercegovine (u daljnjem tekstu: Nezavisni odbor), način provođenja procesa odabira kandidata za policijske rukovodioce i zamjenike rukovodilaca policijskih tijela BiH, procedura objavljivanja javnih konkursa i razmatranje prijave kandidata, način vršenja odabira kandidata za rukovodioce i za zamjenike rukovodilaca policijskih tijela BiH, razmatranje pritužbi na rad rukovodilaca i zamjenika rukovodilaca policijskih tijela BiH, uslovi za iniciranje pokretanja disciplinskog postupka protiv rukovodilaca i zamjenika rukovodilaca policijskih tijela BiH, procedura i razlozi za predlaganje smjenjivanja rukovodilaca i zamjenika rukovodilaca policijskih tijela BiH za čiji izbor je nadležan, vrste podataka i evidencije koje vodi, sredstva za rad Nezavisnog odbora i naknade članova Nezavisnog odbora, dužnosti i odgovornosti članova Nezavisnog odbora, te druga pitanja značajna za rad Nezavisnog odbora.

Član 2. (Principi i način rada Nezavisnog odbora)

- (1) Nezavisni odbor djeluje isključivo na profesionalnim osnovama, ne zastupajući, ne štiteći niti podrivajući interese bilo koje političke stranke, registrirane organizacije ili udruženja, ili bilo kojeg naroda ili pojedinca u Bosni i Hercegovini.
- (2) Nezavisni odbor radi na sjednicama, a odlučuje o pitanjima iz svoje nadležnosti u skladu sa Ustavom Bosne i Hercegovine i Zakonom o nezavisnim i nadzornim tijelima policijske strukture Bosne i Hercegovine (u daljnjem tekstu: Zakon), a po postupku i procedurama utvrđenim ovim poslovnikom.

Član 3. (Sastav i imenovanje Nezavisnog odbora)

Sastav i imenovanje Nezavisnog odbora utvrđeni su Zakonom.

Član 4.
(Princip javnosti)

Predsjednik Nezavisnog odbora, prvi i drugi zamjenik predsjednika brinu o ostvarivanju principa javnosti i ovlašteni su da daju izjave za medije.

POGLAVLJE II. NAČIN I DJELOKRUG NEZAVISNOG ODBORA

Član 5.
(Zakazivanje sjednica)

- (1) Nezavisni odbor zasjeda u Sarajevu, u zgradi Parlamentarne skupštine BiH, u prostorijama koje osigurava Zajednička služba Sekretarijata Parlamentarne skupštine BiH.
- (2) Vrijeme i mjesto održavanja sjednica Nezavisnog odbora određuje predsjednik Nezavisnog odbora, odnosno prvi ili drugi zamjenik predsjednika Nezavisnog odbora u slučaju kada je predsjednik opravdano spriječen.
- (3) Po odluci predsjednika, sjednice Nezavisnog odbora mogu se održati i na drugom mjestu.
- (4) Poziv za sjednicu Nezavisnog odbora, s prijedlogom dnevnog reda, upućuje se članovima Nezavisnog odbora sedam dana prije dana održavanja sjednice.
- (5) Predsjednik Nezavisnog odbora može, kada za to postoje opravdani razlozi, sazvati hitnu sjednicu bez pisanog poziva, a dnevni red za tu sjednicu može predložiti i na samoj sjednici.
- (6) Poziv za sjednicu s dnevnim redom i radni materijal šalju se redovnom preporučenom ili elektronskom poštom članovima Nezavisnog odbora na njihove adrese, a o načinu dostavljanja poziva sekretar Nezavisnog odbora dogovora se sa svakim članom Nezavisnog odbora posebno.
- (7) Članovi Nezavisnog odbora obavezni su prisustvovati zakazanim sjednicama Nezavisnog odbora. Ako nisu u mogućnosti prisustvovati sjednici Nezavisnog odbora, dužni su najaviti odsustvo predsjedniku Nezavisnog odbora najmanje dva dana prije održavanja sjednice, a samo u izuzetno opravdanim slučajevima to mogu učiniti na dan održavanja sjednice.
- (8) Sjednice Nezavisnog odbora održavat će se prema planu rada, a najmanje jednom mjesečno.
- (9) Sjednice Nezavisnog odbora tonski se snimaju.

Član 6.
(Rukovođenje sjednicom)

- (1) Radom Nezavisnog odbora rukovodi predsjednik Nezavisnog odbora, odnosno prvi ili drugi zamjenik predsjednika kada ih za to predsjednik ovlasti ili kada je predsjednik Nezavisnog odbora opravdano spriječen da prisustvuje sjednici.
- (2) Članovi Nezavisnog odbora, kao i ostali učesnici u radu sjednice mogu uzeti riječ po odobrenju predsjednika.
- (3) Predsjednik daje riječ članovima i učesnicima na sjednici prema redu prijavljivanja.
- (4) Članovi Nezavisnog odbora i drugi učesnici treba svoja izlaganja da prilagode temi i značaju pitanja o kojima se vodi rasprava po utvrđenom dnevnom redu te da daju konkretne prijedloge za rješavanje određenih pitanja.

- (5) Predsjednik vodi računa o tome da učesnik u raspravi nesmetano diskutira.
- (6) U slučaju da se učesnik u raspravi udalji od teme o kojoj se raspravlja u okviru dnevnog reda, bit će upozoren. Ako se ogluši o upozorenje, predsjednik će mu oduzeti riječ.

Član 7. **(Kvorum i odlučivanje)**

- (1) Sedam članova Nezavisnog odbora čine kvorum.
- (2) Odluka Nezavisnog odbora je važeća ako za nju glasa sedam članova Nezavisnog odbora i unosi se u zapisnik sa sjednice Nezavisnog odbora, na način da se navede koliko je članova glasalo „za“, koliko je glasalo „protiv“ i koliko je bilo „suzdržano“.
- (3) Svi članovi Nezavisnog odbora ravnopravno učestvuju u raspravi o svakom pitanju koje se uvrsti u dnevni red sjednice Nezavisnog odbora.
- (4) Na sjednici Nezavisnog odbora vodi se zapisnik koji potpisuje predsjednik i zapisničar, odnosno sekretar Nezavisnog odbora, nakon što ga usvoji Nezavisni odbor.
- (5) Svaki član Nezavisnog odbora može izdvojiti svoje mišljenje i zahtijevati da se ono unese u zapisnik.

Član 8. **(Nadležnosti Nezavisnog odbora)**

Nezavisni odbor nadležan je za:

- a) provođenje procesa izbora kandidata za policijske rukovodioce i zamjenike rukovodilaca policijskih tijela BiH,
- b) objavljivanje javnih konkursa i razmatranje prijave kandidata, vršenje odabira i dostavljanja ministru sigurnosti BiH imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH,
- c) predlaganje smjenjivanja rukovodilaca i zamjenika rukovodilaca policijskih tijela BiH, ako su počinili krivično djelo, osim za krivična djela iz oblasti sigurnosti saobraćaja, ili ako počine tešku povredu službene dužnosti, kao i u slučaju ako utvrdi da ne postižu odgovarajuće rezultate,
- d) razmatranje pritužbi na rad rukovodilaca i zamjenika rukovodilaca policijskih tijela BiH i obavještanje o tome ministra sigurnosti BiH i Vijeća ministara BiH,
- e) iniciranje pokretanja disciplinskog postupka protiv rukovodilaca i zamjenika rukovodilaca policijskih tijela BiH,
- f) obradu podataka i vođenje evidencije u skladu sa zakonom i drugim propisima i
- g) ostale poslove propisane zakonom, Poslovníkom i drugim propisima.

Član 9. **(Dužnosti i obaveze predsjednika)**

Predsjednik Nezavisnog odbora:

- a) predstavlja Nezavisni odbor;

- b) priprema nacrt poslovnika o radu Nezavisnog odbora, nacrt godišnjeg plana rada Nezavisnog odbora, i nakon što ih potvrdi Nezavisni odbor, prosljeđuje ih Parlamentarnoj skupštini BiH na usvajanje;
- c) saziva sjednice Nezavisnog odbora;
- d) rukovodi i usmjerava obavljanje poslova iz nadležnosti Nezavisnog odbora;
- e) podnosi godišnji izvještaj o radu Nezavisnog odbora Parlamentarnoj skupštini BiH, nakon što ga usvoji Nezavisni odbor, te posebne izvještaje po potrebi ili na zahtjev Parlamentarne skupštine BiH;
- f) podnosi izvještaje iz tačke e) ovog stava Vijeću ministara BiH i Predsjedništvu BiH, na njihov zahtjev;
- g) potpisuje akte koje donosi Nezavisni odbor;
- h) komunicira s drugim organima, institucijama ili pojedincima, u vezi s obavljanjem poslova iz nadležnosti Nezavisnog odbora;
- i) obavlja druge dužnosti propisane zakonom, ovim poslovníkom, drugim propisima, odlukama ili zaključcima Nezavisnog odbora;
- j) odgovoran je za zakonitost rada Nezavisnog odbora.

Član 10. **(Postupak odabira kandidata)**

- (1) Provođenje postupka odabira kandidata za rukovodioce i zamjenike rukovodilaca policijskih tijela BiH Nezavisni odbor vrši na način dostupan javnosti.
- (2) Zakazane i održane sjednice Nezavisnog odbora kao i javni konkursi i svi rezultati konkursa objavljuju se na službenoj veb-stranici Parlamentarne skupštine BiH.
- (3) Tokom provođenja postupka iz stava (1) ovog člana Nezavisni odbor naročito će voditi računa o:
 - a) stručnim kvalifikacijama i posebnim obukama kandidata,
 - b) radnom iskustvu kandidata i znanju pokazanom na intervjuu iz oblasti pravnog poretka, sigurnosti i policijskih poslova i
 - c) ravnopravnoj nacionalnoj zastupljenosti predloženih kandidata.

Član 11. **(Odluke o raspisivanju javnog konkursa i utvrđivanju uslova i kriterija za odabir)**

- (1) Nezavisni odbor donosi odluke o raspisivanju javnog konkursa kao i o utvrđivanju uslova i kriterija za odabir rukovodilaca i zamjenika rukovodilaca u skladu s važećim zakonima na pozicijama iz svoje nadležnosti.
- (2) Javni konkurs objavljuje se za nepopunjene pozicije čim se steknu uslovi, a za ostale pozicije tri mjeseca prije isteka mandata rukovodiocima i zamjenicima rukovodilaca policijskih tijela BiH.
- (3) Javni konkurs, uz osnovne podatke, sadrži opće i posebne uslove iz Ustava Bosne i Hercegovine i važećih zakona.
- (4) Nezavisni odbor objavljuje javni konkurs za odabir rukovodilaca i zamjenika rukovodilaca policijskih tijela BiH u "Službenom glasniku BiH" i u najmanje tri dnevna lista koji su dostupni na teritoriji Bosne i Hercegovine, kao i na veb-stranici Parlamentarne skupštine BiH.

(5) Prijave na javni konkurs s traženom dokumentacijom dostavljaju se preporučeno, poštom, najkasnije 15 dana od dana objavljivanja u "Službenom glasniku BiH".

Član 12.
(Razmatranje prijava kandidata)

- (1) Prijave kandidata na javni konkurs ispitujući blagovremenost, potpunost dokumentacije i urednost razmatraju svi članovi Nezavisnog odbora.
- (2) Neblagovremene prijave neće biti razmatrane, a nepotpune prijave bit će odbačene.
- (3) Tokom razmatranja prijava iz stava (1) ovog člana, sekretar Nezavisnog odbora vodi zapisnik i popunjava tabelu prijavljenih kandidata o stanju prijava, koju potpisuju svi prisutni članovi Nezavisnog odbora.

Član 13.
(Ocjenjivanje i odabir kandidata)

- (1) Članovi Nezavisnog odbora obaviti će intervju s kandidatima koji ispunjavaju uslove.
- (2) Nakon provedenog procesa ocjenjivanja i bodovanja, od kandidata koji su osvojili više od polovine maksimalno mogućeg broja bodova, Nezavisni odbor vrši odabir i dostavlja ministru sigurnosti BiH rang-listu uspješnih kandidata, odnosno imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH.
- (3) Ministar sigurnosti BiH će u roku od deset dana, dostaviti svoj prijedlog i rang-listu Nezavisnog odbora Vijeću ministara BiH na odlučivanje i izbor.
- (4) Ako ministar sigurnosti BiH ne dostavi svoj prijedlog i rang-listu uspješnih kandidata Vijeću ministara BiH u roku iz stava (3) ovog člana, Nezavisni odbor će rang-listu uspješnih kandidata, u roku od pet dana, neposredno dostaviti Vijeću ministara BiH na odlučivanje i izbor kandidata.

Član 14.
(Razmatranje pritužbi)

- (1) Ako Nezavisni odbor utvrdi da je osnovana pritužba na rad policijskog rukovodioca ili zamjenika rukovodioca policijskih tijela BiH, zaključak o tome bit će dostavljen ministru sigurnosti BiH i Vijeću ministara BiH, radi preduzimanja odgovarajućih mjera.
- (2) Ako pritužba iz stava (1) ovog člana nije osnovana, Nezavisni odbor će je svojim zaključkom odbaciti kao neosnovanu.
- (3) Ako pritužba iz stava (1) ovog člana sadrži i obilježja krivičnog djela, Nezavisni odbor će o tome izvjestiti nadležno tužilaštvo.

Član 15.
(Iniciranje pokretanja disciplinskog postupka)

- (1) Ako Nezavisni odbor dođe do saznanja da je policijski rukovodilac ili zamjenik rukovodioca policijskog tijela BiH počinio ili se može osnovano sumnjati da je počinio težu povredu službene dužnosti, inicijativu za pokretanje disciplinskog postupka dostaviti će nadležnoj Disciplinskoj komisiji.

(2) Ako djelo iz stava (1) ovog člana sadrži i obilježja krivičnog djela, Nezavisni odbor će o tome izvijestiti nadležno tužilaštvo.

Član 16. (Predlaganje smjene)

(1) Policijski rukovodilac ili zamjenik rukovodioca policijskog tijela BiH ne može biti smijenjen bez prethodnog prijedloga Nezavisnog odbora za smjenu.

(2) Nezavisni odbor može na vlastitu inicijativu, na inicijativu ministra sigurnosti BiH ili na inicijativu bilo kojeg organa vlasti u BiH a kada ocijeni opravdanim, predložiti suspenziju i smjenu policijskog rukovodioca ili zamjenika rukovodioca policijskih tijela BiH.

(3) Nezavisni odbor dužan je predložiti smjenu rukovodioca ili zamjenika rukovodioca policijskog tijela BiH za čiji izbor je nadležan, ako je počinio krivično djelo, osim za krivična djela iz oblasti sigurnosti saobraćaja, ili ako je počinio tešku povredu službene dužnosti, ako je to utvrđeno pravosnažnom odlukom nadležnog organa.

(4) Prijedlog smjene policijskog rukovodioca ili zamjenika rukovodioca policijskih tijela BiH iz st. (2) i (3) ovog člana, Nezavisni odbor dostavlja Vijeću ministara BiH na odlučivanje.

(5) Ako Nezavisni odbor odluči da odbije inicijativu za smjenu policijskog rukovodioca ili zamjenika rukovodioca policijskih tijela BiH iz stava (2) ovog člana, dužan je u roku od 15 dana obavijestiti podnosioca inicijative o svojoj odluci.

POGLAVLJE III. TEHNIČKA PITANJA ZNAČAJNA ZA RAD NEZAVISNOG ODBORA

Član 17. (Prisustvo trećih lica na sjednicama)

(1) Sjednici Nezavisnog odbora mogu prisustvovati lica koja pozove predsjednik Nezavisnog odbora ili ranije najavljena lica.

(2) Nezavisni odbor može odlučiti da lica iz stava (1) ovog člana i nepozvana lica mogu prisustvovati sjednici Nezavisnog odbora u dijelu sjednice koji se odnosi na raspravu i rad za koji imaju pravni interes, dok ne mogu biti prisutni sjednici Nezavisnog odbora u dijelu sjednice kada se odlučuje, boduju i ocjenjuju kandidati ili kada se glasa o određenim pitanjima iz nadležnosti Nezavisnog odbora.

(3) Na poziv Nezavisnog odbora, u radu mogu učestvovati i stručna lica iz institucija BiH radi davanja stručnih obrazloženja i objašnjenja, naučni radnici i stručna lica, kao i predstavnici međunarodne zajednice u BiH, bez prava odlučivanja.

Član 18. (Posebna prava Nezavisnog odbora)

(1) Nezavisni odbor ima pravo da traži od komisija Parlamentarne skupštine BiH, Vijeća ministara BiH, Ministarstva sigurnosti BiH i njegovih upravnih i samostalnih organizacija i agencija informacije i obavještenja koja su mu potrebna za rad, kao i druge podatke kojima raspolažu ili su dužni da ih prikupljaju ili evidentiraju.

(2) Članovi Nezavisnog odbora, po ovlaštenju predsjednika, s ciljem prikupljanja informacija i obavještenja iz stava (1) ovog člana mogu posjetiti navedne organe i izvršiti uvid u odgovarajuće izvještaje, predmete ili evidencije.

Član 19.
(Podrška u radu Nezavisnom odboru)

Zajednička služba Sekretarijata Parlamentarne skupštine BiH pruža svu potrebnu administrativno-tehničku i materijalno-finansijsku podršku, na način da osigura sva sredstva neophodna za rad Nezavisnog odbora i njegovih članova te da odredi sekretara za obavljanje stručnih i administrativno - tehničkih poslova u radu Nezavisnog odbora.

Član 20.
(Saradnja i pružanje pomoći Nezavisnom odboru)

Organi uprave i druge institucije BiH kao i druga odgovarajuća tijela i organi u BiH dužni su saradivati s Nezavisnim odborom i pružati potrebnu pomoć u obavljanju poslova iz njegove nadležnosti, u skladu sa zakonom i drugim propisima.

Član 21.
(Pečat i memorandum)

- (1) Nezavisni odbor za ovjeru svojih odluka i drugih službenih akata u okviru svog djelokruga te za korespondenciju koristi memorandum i pečat Parlamentarne skupštine BiH.
- (2) Pečatom se ovjerava potpis predsjednika Nezavisnog odbora, a potpisi prvog i drugog zamjenika po ovlaštenju predsjednika.

Član 22.
(Evidencije, protokol i obrada podataka)

- (1) Sekretar Nezavisnog odbora dužan je da uspostavi knjigu protokola i da brine o svim aktima Nezavisnog odbora u skladu s propisima o kancelarijskom poslovanju.
- (2) Sekretar Nezavisnog odbora dužan je da uspostavi evidencije predstavki, dostavljenih prijedloga za pokretanje disciplinskih postupaka i evidenciju kandidata za izbor i smjenu rukovodilaca i zamjenika rukovodilaca policijskih tijela BiH.

Član 23.
(Naknade za rad članova Nezavisnog odbora)

Članovi Nezavisnog odbora imaju pravo na stalnu mjesečnu naknadu kao i druga materijalna prava i primanja u visini koju odredi Zajednička komisija za administrativne poslove Parlamentarne skupštine BiH na osnovu kriterija iz Odluke Vijeća ministara BiH o kriterijima za utvrđivanje novčane naknade za rad u upravnim odborima, nadzornim i drugim odborima i drugim radnim tijelima iz nadležnosti institucija Bosne i Hercegovine.

Član 24.
(Posebne obaveze članova Nezavisnog odbora i sekretara)

Članovi Nezavisnog odbora i sekretar dužni su čuvati sve podatke, a posebno podatke koji su povjerljive prirode, za vrijeme trajanja i po prestanku članstva u Nezavisnom odboru, i odgovorni su u slučaju odavanja podataka u skladu sa Zakonom o zaštiti ličnih podataka, Zakonom o zaštiti tajnih podataka i drugim propisima.

Član 25.
(Službena iskaznica članova Nezavisnog odbora)

Članovi Nezavisnog odbora imaju službenu iskaznicu koja važi do isteka mandata.

POGLAVLJE IV. PRIJELAZNE I ZAVRŠNE ODREDBE

Član 26.
(Posebna pitanja)

- (1) Pitanja koja nisu regulirana ovim poslovníkom mogu se uređivati odlukom i zaključkom Nezavisnog odbora.
- (2) Izmjene i dopune Poslovníka vrše se na način predviđen za njegovo donošenje.

Član 27.
(Početak postupka odabira)

U roku od pet radnih dana od dana stupanja na snagu ovog poslovníka počet će postupak odabira kandidata za policijske rukovodioce i zamjenike rukovodilaca policijskih tijela BiH za koje je Nezavisni odbor nadležan.

Član 28.
(Stupanje na snagu Poslovníka)

Ovaj poslovník stupa na snagu osmog dana od dana objavljivanja u "Službenom glasniku BiH".

PSBiH, broj: 451/09
13. novembra 2009. godine
Sarajevo

Predsjedavajući
Predstavničkog doma
Parlamentarne skupštine BiH
dr. Milorad Živković

Predsjedavajući
Doma naroda
Parlamentarne skupštine BiH
Ilija Filipović, dipl.iur.